

## **SESSIONI URDINARIA DI U 1U DI GHJUGNU DI U 2023**

**N° 2022 /M3/55**

**QUISTIONI URALI DIPUSITATA DA LERIA MARIA MUSSO  
PÀ U GRUPPU « AVVENE GHJUSTU È RESILITENTE », À L'ATTINZIONE DI U  
PRESIDENTE DI U CUNSIGLIU ESECUTIVU**

### **Ughjettu : Travagliu di l'attelli nant'à i sbaragli maffiosi**

Caru sgiò presidente di u Cunsigliu Esecutivu,

U 18 di nuvembre di u 2023, l'Assemblea di a Corsica hà aduttatu una risuluzione sulenna nant'à i « sbaragli maffiosi ». Sta sessione strasurdinaria hè storica.

Tuttu l'eletti di l'Assemblea è di u Cunsigliu Esecutivu, anu ricunnisciutu u fattu chì sì, in Corsica, ci hè un fattu maffiosu, chì ghjè una minaccia pà a nostra sucità.

Vi sete ancu impegnati, voi è tutti l'atri eletti, ind'a criazione d'« attelli », cumposti d'eletti è di membri d'associi, da truvà i mezi da luttà contru à sti « sbaragli maffiosi » à u livellu di a Cullettività di Corsica. Sò cinque questi attelli, nant'à i temi di l'educazione, etica è pulitiche pubbliche, legge, droga, settori ecunomici spostati. Avete dichjaratu tandu chì ste soluzioni sarianu pruposte ind'un raportu, prisintatu à l'Assemblea di ghjugnu.

Oghje, à chì ne semu o sgiò presidente ?

A messa in anda è l'urrganizazione di st'attelli pone parecchie difficoltà. Prima, i posti di rapurtadori è di coordinadori sò stati, pà una parte maiò, dati à eletti di a maghjurità. Hè un elementu chì limiteghja i dibattiti è e pussibilità di travagliu, senza mancu parlà di u fattu chì pluralistu ùn pò esse stu spartimentu. D'altronde, certi coordinadori anu ricusatu d'andà in fondu à e cose, è di studià temi precisi – e rumenzule, u PADDUC, i marcati pubblici... Certi conti resi di riunione sò stati tronchi è sò state cacciate dumande precise d'associi à parecchi intarvinanti.

Fora di unipochi d'eletti di a maghjurità, a maiò parte di l'eletti ùn hè mai più vinuta dopu à a prima riunione, quandu ci eranu i media. Dopu a risuluzione sulenna è l'impegnu publicu di tutti l'eletti, sarà ghjuntu u tempu di u disintaressu ? Ci sarà calcosa da teme di st'attelli ?

Sgiò presidente, compiu quì cù trè dumande : **sarà prontu di ghjugnu u raportu nant' à i « sbaragli maffiosi » ?**

**Avete privistu di prupone misure concrete di lotta contru à i « sbaragli maffiosi », da mette in opara à u livellu di a Cullittività ?**

**Par ciò chì tocca à u prughjettu d'autunumia è à e neguzazione cù u governu francese, pinsate di metteci e pruposte sbucciate in l'attelli contru à i “sbaragli maffiosi” ?**